



Fundasaun Mahein (FM), 31 Juliu 2018

Komunikadu Imprensa

Impaktu husi Migrasaun iha Timor-Leste no Nia Setor Seguransa

Dezde Timor-Leste hetan independensia, iha ona migrasaun regulár no irregulár sira ne'ebé servisu liu-liu iha seitor konstrusaun, servisu sira no komersiu. Ida ne'e hanesan rezultadu husi fator balun inklui "menus husi rekursu umanu ne'ebé kualifikadu iha rai-laran no ekonomia ho baze dollar (\$) no kombina ho fronteira ne'ebé luan ho Repúblika Indonézia (RI), ne'ebé halo monitorizasaun no regulamentasaun ba migrasaun sai difikuldade liu tan.

Objetivu husi husi relatóriu ne'e atu determina sirkulasaun migrasaun tama Timor-Leste, impaktu sira ba Timor-Leste nia desenvolvimentu no seguransa, no oinsa efetivu seguransa rezolve ona ida ne'e intermus nivel operacional no liu husi polítika no lejislasaun. Impaktu sira migrasaun ne'ebé hanesan preokupa maka'as liu ba setor seguransa Timor-Leste nian iha rua.

Primeru, iha persepsaun ba kompetisaun entre trabalador lokal no migrante sira iha sidade, ho trabalador Timor-oan foin-sa'e sira no graduadu sira hasoru kompetisaun ne'ebé maka'as iha merkadu traballu ne'ebé ejije rekursu umanu ida ne'ebé kualifikadu no husi traballador migrante sira. Potensia perigu husi ida ne'e maka kompetisaun sira hanesan ne'e bele sai hanesan fator ba konflitu tamba la iha balansu ne'ebé kria entre traballador lokal no migrante, liu-liu banhira foin-sa'e sira Timor-Leste aumenta no nivel dezempregu aumenta mos. Segundu, kestaun trafiku umanu ba servisu forsadu no seksual, ho Timor-Leste hanesan Nasaun orijen no distinasau, nomos trafiku umanu iha rai laran.

Lejislasaun migrasaun nian ne'ebé aprova iha tinan 2017 fornese klareza ne'ebé boot liu kona-bá kondisaun sira vistu entrada nian hodi regula migrasaun ne'ebé efetivu liu, maibe totalmente la implementa. Atu hala'o ida ne'e presiza koordinasaun ne'ebé boot liu-liu entre Servisu Migrasaun, Ministériu Negosiu Estranjeiru no Kooperasaun no Sekretaria Estadu Polítika Formasaun no Empregu (SEPFOPE). Nomos sei falta polítika hodi orieta prosesu ne'e.

Lejislasaun kombate trafiku umanu ne'ebé aprova iha tinan 2017 hatuur mekanismu sira ne'ebé forte hodi prevene no kombate trafiku umanu, komplementa ho Planu Asaun Nasional ida komprensivu ida kontra trafiku umanu. Atu sai efetivu liu, presiza ajusta ho modelu interdusaun/bandu ida. Ida ne'e presiza hasa'e kapasidade vijilansia ba Nasaun viziñu sira iha rejiaun hodi monitoriza fronteira rai-maran no tasi Timor-Leste nian, aumenta kooperasaun fronteira nian ho Repúblika Indonézia no sosializasaun ne'ebé luan husi autoridade seguransa sira no comunidade hodi hasa'e konsiensializasaun no rezilensia kontra trafiku umanu.

Rekomendasaun

1. Orienta fila-fali sistema edukasaun hodi forma gradudu sira ne'ebé ho abilidade pratika traballu sira hodi redus ka hamenus dependensia ba traballador migrante sira no fó oportunidade empregu ba sidadaun Timor-Leste.
2. Alterasaun ba atual modelu interdisaun/bandu ba kombate trafiku umanu hodi hasa'e mekanismu partilla informasaun, kapasidade vijilancia ho Nasaun viziñu sira iha rejiaun iha monitorizasaun iha fronteira rai-maran no tasi, kooperasaun hakat fronteira no entre institusaun sira ho Repúblika Indonézia, sosializasaun ba ajente sira seguransa no comunidade sira hodi konsensializa no rezilensia kontra trafiku umanu.
3. Fornesementu finanseiru husi Governu ba grupu traballu sira kona-bá prevensaun, hodi permiti involvimentu no rezilensia comunidade nian ne'ebé boot liu tan.
4. Sosializasaun ba lijislasaun atual kona-bá migrasaun ba sidadaun Timor-Leste no comunidade internasional iha Timor-Leste, ho implementasaun ida ne'ebé efetivu husi lejislasaun ida ne'e.
5. Prosesu ida ne'ebé eficiente no transparante kona-bá aplikasaun ba vistu traballu nian, vistu ida hodi estabese rezidensia permanente (ne'ebé hanesan vistu inisiu ba hela fatin), vistu ba peskija, vistu voluntariu no sira seluk-tan ne'ebé disponivel lalais nune'e migrante sira la bele hahu servisu iha Timor-Leste ho ilegal. To'o ohin lora, migrante sira ne'ebé submete aplikasaun ba vistu la'os turista nian la prezisa renova vistu turista foun, nune'e bele klarefika lolos número traballador migrante iha Timor-Leste no evita kontinua utiliza vistu turismu hodi halo servisu.
6. Kria Grupu Traballu ida entre Servisu Migrasaun, Ministériu Negosiu Estranjeru no Kooperasaun no Sekretaria Estadu Polítika Formasaun Professional no Empregu (SEPFOPE), atu dezenvolve politika migrasaun no mellora koordenasaun kona-bá aplikasaun vistu, emisaun no monitorizasaun.
7. Servisu Migrasaun nian, hanesan regra mínimu ida, no hanesan kestaun ida kona-bá urjénsia, fornese informasaun tomak kona-bá sidadaun estranjeiru ne'ebé rejeita ka lasimu tama iha Timor-Leste no tambasa, iha situu ka website Servisu Migrasaun nian no direktamente ba Embaixada sira Nasaun afetadu sira nian.
8. Vistu Turista kona-bá ema ne'ebé foin to'o mai inklui Vistu ba fulan 1, 2 no 3 hodi fasilita turista fasil liu asesu no hamenus prosesu burokrátiku ba estensaun vistu.

Atu hetan informasaun kle'an liu kona-bá asuntu ne'e bele kontaktu:

Nélson Belo

Diretor Ezekutivu

Email: direktor.mahein@gmail.com

Telemovel: (+670) 78316075 ka 77561184

Website: www.fundasaunmahein.org